

საქართველოს ეროვნული ბანკის პრეზიდენტის

ბრძანება №156/04
2020 წლის 2 სექტემბერი

ქ. თბილისი

მომხმარებლის ძლიერი ავთენტიფიკაციის წესის დამტკიცების შესახებ

„საქართველოს ეროვნული ბანკის შესახებ“ საქართველოს ორგანული კანონის მე-15 მუხლის პირველი პუნქტის „ზ“ ქვეპუნქტის, ამავე ორგანული კანონის 48² მუხლის და „საგადახდო სისტემისა და საგადახდო მომსახურების შესახებ“ საქართველოს კანონის 30-ე მუხლის მე-5 პუნქტის, 42-ე მუხლის პირველი პუნქტისა და მე-2 პუნქტის „ა“ და „ბ“ ქვეპუნქტების საფუძველზე, ვბრძანებ:

მუხლი 1

დამტკიცდეს მომხმარებლის ძლიერი ავთენტიფიკაციის წესი თანდართულ დანართთან ერთად.

მუხლი 2

ეს ბრძანება ამოქმედდეს გამოქვეყნებისთანავე.

ეროვნული ბანკის პრეზიდენტი

კობა გვენეტაძე

მომხმარებლის ძლიერი ავთენტიფიკაციის წესი

თავი I

ზოგადი დებულებები

მუხლი 1. მიზანი და მოქმედების სფერო

1. ამ წესის მიზანია საგადახდო მომსახურების მომხმარებლის უსაფრთხო ავთენტიფიკაციის უზრუნველყოფა, მათ შორის, საგადახდო მომსახურების მომხმარებლის უსაფრთხოების პერსონიფიცირებული მახასიათებლების კონფიდენციალობისა და მთლიანობის დაცვა, ასევე თაღლითობისა და სხვა უკანონო ქმედების რისკის შემცირება, რაც დადებითად აისახება საფინანსო სექტორის სტაბილურობაზე, გააძლიერებს მომხმარებლების დაცვას, ხელს შეუწყობს საფინანსო და საგადახდო სისტემის ეფექტიან და სანდო ფუნქციონირებას, აამაღლებს მომხმარებლების ნდობას საგადახდო მომსახურებებისა და უნაღდო გადახდების მიმართ.

2. ეს წესი განსაზღვრავს საქართველოს ეროვნული ბანკის მიერ ლიცენზირებული კომერციული ბანკის და მიკრობანკის, საქართველოს ეროვნული ბანკის მიერ რეგისტრირებული საგადახდო მომსახურების პროვაიდერისა და მიკროსაფინანსო ორგანიზაციის (შემდგომში – საგადახდო მომსახურების პროვაიდერი) მიერ მომხმარებლის ძლიერი ავთენტიფიკაციის განხორციელების, მომხმარებლის ძლიერი ავთენტიფიკაციის მოთხოვნისგან გამონაკლისით სარგებლობის, საგადახდო მომსახურების მომხმარებლის (შემდგომში – მომხმარებელი) უსაფრთხოების პერსონიფიცირებული მახასიათებლების კონფიდენციალობისა და მთლიანობის დაცვის და მათთან დაკავშირებულ საკითხებს.

3. ამ წესის მოქმედება ვრცელდება გადამხდელის მიერ:

ა) დისტანციურად ონლაინრეჟიმში თავის საგადახდო ანგარიშზე წვდომაზე;

ბ) ელექტრონული გადახდის ოპერაციის ინიცირებაზე;

გ) დისტანციური არხის საშუალებით განხორციელებულ ნებისმიერ ისეთ ქმედებაზე, რომელიც თაღლითობის ან/და სხვა უკანონო ქმედების რისკის მატარებელია.



მუხლი 2. ტერმინთა განმარტება

ამ წესში გამოყენებულ ტერმინებს აქვს შემდეგი მნიშვნელობა:

ა) ავთენტიფიკაცია – პროცედურა, რომელიც საგადახდო მომსახურების პროვაიდერს საშუალებას აძლევს მოახდინოს მომხმარებლის იდენტობის დადგენა ან/და საგადახდო ინსტრუმენტის გამოყენების ვალიდურობის დადგენა, რომელიც, მათ შორის, მოიცავს მომხმარებლის მიერ გამოყენებული უსაფრთხოების პერსონიფიცირებული მახასიათებლების შემოწმებას;

ბ) მომხმარებლის ძლიერი ავთენტიფიკაცია – ავთენტიფიკაცია, რომელიც დამყარებულია ორი ან მეტი შემდეგი სხვადასხვა კატეგორიის ელემენტების გამოყენებაზე: ცოდნა (ის, რაც მხოლოდ მომხმარებელმა იცის), ფლობა (ის, რასაც მხოლოდ მომხმარებელი ფლობს) და უნიკალურობა (ის, რაც თვით მომხმარებელია), რომლებიც ერთმანეთისგან დამოუკიდებელია იმგვარად, რომ ერთი კატეგორიის ელემენტის ნებისმიერი გზით გამჟღავნება არ გამოიწვევს დანარჩენი კატეგორიების ელემენტის/ელემენტების საიმედოობის კომპრომეტირებას. ავთენტიფიკაციის პროცედურა შემუშავებული და დანერგული უნდა იყოს იმგვარად, რომ მისი განხორციელებისას დაცული იქნეს ავთენტიფიკაციის მონაცემების კონფიდენციალობა;

გ) უსაფრთხოების პერსონიფიცირებული მახასიათებლები – პერსონიფიცირებული მახასიათებლები, რომელსაც საგადახდო მომსახურების პროვაიდერი აწვდის მომხმარებელს ავთენტიფიკაციის მიზნებით;

დ) სენსიტიური საგადახდო მონაცემი – მონაცემები, მათ შორის, უსაფრთხოების პერსონიფიცირებული მახასიათებლები, რომლის საშუალებით შესაძლებელია თაღლითური ოპერაციის განხორციელება;

ე) პაკეტური ფაილი – ერთზე მეტი ინდივიდუალური გადახდის ოპერაციების ერთობლიობა.

მუხლი 3. ზოგადი უფლებები და ვალდებულებები

1. საგადახდო მომსახურების პროვაიდერი ვალდებულია ამ წესის მოთხოვნების დაცვით უზრუნველყოს მომხმარებლის ძლიერი ავთენტიფიკაცია, როდესაც მისი მომხმარებელი – გადამხდელი ახორციელებს:

ა) დისტანციურად ონლაინრეჟიმში თავის საგადახდო ანგარიშზე წვდომას;

ბ) ელექტრონული გადახდის ოპერაციის ინიცირებას;

გ) დისტანციური არხის საშუალებით ნებისმიერ ისეთ ქმედებას, რომელიც თაღლითობის ან/და სხვა უკანონო ქმედების რისკის მატარებელია.

2. საგადახდო მომსახურების პროვაიდერი ვალდებულია ჰქონდეს გადახდის ოპერაციების მონიტორინგის მექანიზმი, რომლითაც ის შეძლებს არაავტორიზებული ან/და თაღლითური გადახდის ოპერაციების იდენტიფიცირებას. საგადახდო მომსახურების პროვაიდერი ვალდებულია მონიტორინგი განახორციელოს დროის რეალურ რეჟიმში ამ წესის მე-20 მუხლით განსაზღვრული გამონაკლისით სარგებლობისას, ასევე, ისეთი გადახდის ოპერაციების წარმოებისას, როდესაც გადახდის ოპერაციის შესრულება მყისიერად ხორციელდება.

3. გადახდის ოპერაციების მონიტორინგის მექანიზმი უნდა ეფუძნებოდეს გადახდის ოპერაციების ანალიზს. ანალიზი უნდა ითვალისწინებდეს იმ ელემენტებს, რომლებიც დამახასიათებელია მომხმარებლისთვის მის მიერ პერსონიფიცირებული უსაფრთხოების მახასიათებლების ჩვეული გამოყენების დროს.

4. საგადახდო მომსახურების პროვაიდერი ვალდებულია უზრუნველყოს, რომ გადახდის ოპერაციების მონიტორინგის მექანიზმი ითვალისწინებდეს, სულ მცირე, რისკზე დაფუძნებულ შემდეგ ფაქტორებს:

ა) კომპრომეტირებული ან/და მოპარული ავთენტიფიკაციის ელემენტების ჩამონათვალს;

ბ) თითოეული გადახდის ოპერაციის თანხას;



გ) თაღლითობის ცნობილ სცენარებს, რომლებსაც შესაძლოა ადგილი ჰქონდეს საგადახდო მომსახურების განხორციელებისას;

დ) ავთენტიფიკაციის პროცესის თითოეულ სესიაში შეფერხების ან/და დაზიანების გამომწვევი, ასევე ინფორმაციაზე არაუფლებამოსილი წვდომისთვის განკუთვნილი ფარული პროგრამული უზრუნველყოფის არსებობის ნიშნებს;

ე) თუ წვდომის ტექნიკური მოწყობილობა ან პროგრამული უზრუნველყოფა მომხმარებლისთვის საგადახდო მომსახურების პროვაიდერის მიერ არის მიწოდებული, მომხმარებლის მიერ მათი გამოყენების, მათ შორის, უჩვეულო გამოყენების აქტივობის ჩანაწერებს.

5. თუ საგადახდო მომსახურების პროვაიდერი მომხმარებლის მიერ დისტანციურად ონლაინ რეჟიმში თავის საგადახდო ანგარიშზე წვდომისთვის ძლიერ ავთენტიფიკაციას ახორციელებს ცოდნისა და ფლობის კატეგორიების ელემენტების გამოყენებით, მომხმარებლის მიერ იმავე უწყვეტი სესიის ფარგლებში ამ მუხლის პირველი პუნქტის „ბ“ და „გ“ ქვეპუნქტებით გათვალისწინებული ქმედებების განხორციელებისას, საგადახდო მომსახურების პროვაიდერი უფლებამოსილია მომხმარებლის ძლიერი ავთენტიფიკაციისთვის ერთ-ერთ ელემენტად გამოიყენოს სესიის დაწყებისას გამოყენებული ცოდნის კატეგორიის ელემენტი. აღნიშნული უფლებამოსილებით სარგებლობას საგადახდო მომსახურების პროვაიდერი უნდა ახორციელებდეს რისკზე დამყარებული მიდგომის საფუძველზე.

მუხლი 4. სპეციფიკური და შეზღუდული გამოყენების საგადახდო ინსტრუმენტები

1. საგადახდო მომსახურების პროვაიდერი უფლებამოსილია საქართველოს ეროვნულ ბანკთან შეთანხმებით არ გაავრცელოს ამ წესის მოქმედება სპეციფიკური, შეზღუდული გამოყენების საგადახდო ინსტრუმენტზე, რომელიც მოქმედებს მხოლოდ საქართველოში და აკმაყოფილებს შემდეგი პირობებიდან ერთ-ერთს:

ა) უშუალოდ ინსტრუმენტის გამომშვებსა და მომსახურების მიმწოდებლებს შორის არსებული კომერციული/სავაჭრო შეთანხმების ფარგლებში, ინსტრუმენტის მფლობელს აქვს საშუალება მხოლოდ ამავე მომსახურების მიმწოდებლების შეზღუდულ ქსელში შეიძინოს საქონელი ან/და მომსახურება;

ბ) ინსტრუმენტი შესაძლოა გამოყენებულ იქნეს მხოლოდ საქონლის ან/და მომსახურების მკაცრად შეზღუდული სპექტრის შესაძენად;

გ) ინსტრუმენტი გაიცემა მეწარმე სუბიექტის ან ადმინისტრაციული ორგანოს მოთხოვნით, ემსახურება ადმინისტრაციული ორგანოს სოციალურ ან საგადასახადო მიზნებს და გამოიყენება განსაზღვრული საქონლის ან/და მომსახურების შესაძენად იმ მიმწოდებლებისგან, რომელთაც ხელშეკრულება დადებული აქვს ამ ინსტრუმენტის გამომშვებთან.

2. საგადახდო მომსახურების პროვაიდერი, რომელსაც სურს ისარგებლოს კონკრეტული ინსტრუმენტის მიმართ ამ მუხლის პირველი პუნქტით განსაზღვრული უფლებამოსილებით, ვალდებულია საქართველოს ეროვნულ ბანკს თანხმობის მისაღებად წერილობით წარუდგინოს საგადახდო ინსტრუმენტის შესახებ ინფორმაცია და აღწერა. საქართველოს ეროვნული ბანკი საგადახდო მომსახურების პროვაიდერის მიერ აღნიშნული უფლებამოსილებით სარგებლობის თაობაზე გადაწყვეტილებას იღებს ინფორმაციისა და აღწერის მიღებიდან 30 სამუშაო დღის ვადაში.

მუხლი 5. უსაფრთხოების ზომების გადამოწმება

1. საგადახდო მომსახურების პროვაიდერი ვალდებულია განახორციელოს ამ წესით განსაზღვრული უსაფრთხოების ზომების დანერგვის დოკუმენტირება და წელიწადში სულ მცირე ერთხელ პერიოდული შემოწმება (ტესტირება), შეფასება და აუდიტი თავის მიერ დადგენილი წესის შესაბამისად. განხორციელებული აუდიტის ანგარიში უნდა შეიცავდეს საგადახდო მომსახურების პროვაიდერის უსაფრთხოების ზომების ამ წესის მოთხოვნებთან შესაბამისობის შეფასებას და ანგარიშგებას.

1¹. საგადახდო მომსახურების პროვაიდერი ვალდებულია უზრუნველყოს ამ წესის შესაბამისად დანერგილი უსაფრთხოების ზომების დროული განახლება პრაქტიკაში რეალიზებული შემთხვევებიდან, შემოწმებისა (ტესტირების) და შეფასების შედეგად გამოვლენილი საფრთხეებიდან და იდენტიფიცირებული ნაკლოვანებებიდან, ასევე, აუდიტის ანგარიშიდან გამომდინარე.

2. ამ მუხლის პირველი პუნქტით განსაზღვრული აუდიტი უნდა განხორციელდეს აუდიტორის მიერ,



რომელიც, მიუხედავად იმისა, წარმოადგენს თუ არა ის კონკრეტული საგადახდო მომსახურების პროვაიდერის თანამშრომელს, საოპერაციო თვალსაზრისით დამოუკიდებელია ამ პროვაიდერისგან და რომელსაც, ამავდროულად, აქვს შესაბამისი ცოდნა და გამოცდილება საინფორმაციო ტექნოლოგიების უსაფრთხოებისა და საგადახდო მომსახურების სფეროებში.

3. საგადახდო მომსახურების პროვაიდერი, რომელიც სარგებლობს ამ წესის მე-20 მუხლით გათვალისწინებული გამონაკლისით, ვალდებულია განახორციელოს მეთოდოლოგიის, მოდელისა და ანგარიშგებით მიწოდებული (შეტყობინებული) თაღლითობის მაჩვენებლების აუდიტი წელიწადში სულ მცირე ერთხელ. ასეთი აუდიტი უნდა მოიცავდეს მაჩვენებლებისა და მონაცემების სისრულისა და სისწორის შეფასებასაც. აუდიტორის მიმართ ვრცელდება ამ მუხლის მე-2 პუნქტის მოთხოვნები.

4. საქართველოს ეროვნული ბანკი უფლებამოსილია საგადახდო მომსახურების პროვაიდერს მოსთხოვოს ამ წესით განსაზღვრული გარკვეული კომპონენტების გარე აუდიტის განხორციელება. საქართველოს ეროვნული ბანკი განსაზღვრავს ასეთი აუდიტის განხორციელებისა და აუდიტის ანგარიშის მისთვის მიწოდების ვადებს.

5. ამ წესის მე-20 მუხლით გათვალისწინებული გამონაკლისით სარგებლობის შემთხვევაში, სარგებლობის დაწყებიდან ერთი წლის განმავლობაში და სულ მცირე სამ წელიწადში ერთხელ, ან საქართველოს ეროვნული ბანკის შესაბამისი მოთხოვნის საფუძველზე უფრო მეტი სიხშირით, საგადახდო მომსახურების პროვაიდერი ვალდებულია განახორციელოს მეთოდოლოგიის, მოდელისა და ანგარიშგებით მიწოდებული (შეტყობინებული) თაღლითობის მაჩვენებლების გარე აუდიტი დამოუკიდებელი და კვალიფიციური აუდიტორის/აუდიტორების მიერ. ასეთი აუდიტი უნდა მოიცავდეს მაჩვენებლებისა და მონაცემების სისრულისა და სისწორის შეფასებასაც.

6. საქართველოს ეროვნული ბანკი უფლებამოსილია საგადახდო მომსახურების პროვაიდერს მოსთხოვოს, ხოლო საგადახდო მომსახურების პროვაიდერი ვალდებულია შესაბამისი მოთხოვნის მიღებიდან 14 კალენდარული დღის განმავლობაში საქართველოს ეროვნულ ბანკს მიაწოდოს ნებისმიერი განხორციელებული აუდიტის სრული ანგარიში.

საქართველოს ეროვნული ბანკის პრეზიდენტის 2021 წლის 28 დეკემბრის ბრძანება №183/04 - ვებგვერდი, 28.12.2021 წ.

თავი II

უსაფრთხოების ზომები მომხმარებლის ძლიერი ავთენტიფიკაციისთვის

მუხლი 6. ავთენტიფიკაციის კოდი

1. საგადახდო მომსახურების პროვაიდერის მიერ გამოყენებული მომხმარებლის ძლიერი ავთენტიფიკაციის შედეგად უნდა გენერირდებოდეს ავთენტიფიკაციის კოდი. მომხმარებლის ძლიერი ავთენტიფიკაცია უნდა ეფუძნებოდეს სულ მცირე ორ ელემენტს შემდეგი სხვადასხვა კატეგორიებიდან:

ა) ცოდნა;

ბ) ფლობა;

გ) უნიკალურობა.

2. თუ ავთენტიფიკაციის კოდი გამოიყენება საგადახდო ანგარიშის დისტანციურად ონლაინრეჟიმში წვდომისთვის, ელექტრონული გადახდის ოპერაციის ინიცირებისთვის ან დისტანციური არხის საშუალებით ნებისმიერი ისეთი ქმედების განსახორციელებლად, რომელიც თაღლითობის ან/და სხვა უკანონო ქმედების რისკის მატარებელია, ასეთი კოდი საგადახდო მომსახურების პროვაიდერის მიერ ავთენტიფიკაციისთვის შეიძლება მიღებულ იქნეს მხოლოდ ერთხელ.

3. ამ მუხლის პირველი და მე-2 პუნქტების მიზნებისთვის, საგადახდო მომსახურების პროვაიდერი ვალდებულია, შეიმუშაოს და დანერგოს უსაფრთხოების ზომები, რომლებიც აკმაყოფილებს შემდეგ მოთხოვნებს:

ა) ავთენტიფიკაციის კოდის გამჟღავნება არ უნდა ქმნიდეს ამ მუხლის პირველი პუნქტით გათვალისწინებული ელემენტების შესახებ ნებისმიერი ინფორმაციის დადგენის შესაძლებლობას;

ბ) შეუძლებელი უნდა იყოს ახალი ავთენტიფიკაციის კოდის გენერირება ადრე გენერირებულ



ნებისმიერი ავთენტიფიკაციის კოდის ცოდნაზე დაყრდნობით;

გ) შეუძლებელი უნდა იყოს ავთენტიფიკაციის კოდის გაყალბება.

4. საგადახდო მომსახურების პროვაიდერის მიერ ავთენტიფიკაციის კოდის გენერირებით განხორციელებული ავთენტიფიკაცია უნდა მოიცავდეს ყველა შემდეგ ზომას:

ა) თუ დისტანციურად წვდომისთვის, დისტანციური ელექტრონული გადახდის ოპერაციის ინიცირებისთვის და სხვა ნებისმიერი დისტანციური არხის საშუალებით ნებისმიერი ისეთი ქმედების, რომელიც თაღლითობის ან/და სხვა უკანონო ქმედების რისკის მატარებელია, განხორციელებისთვის ამ მუხლის მე-2 პუნქტის მიზნების გათვალისწინებით გამოსაყენებელი კოდის გენერირება წარუმატებელი აღმოჩნდა, შედეგად, შეუძლებელი უნდა იყოს გამოყენებული ელემენტებიდან მცდარი ელემენტის/ელემენტების იდენტიფიცირება;

ბ) ავთენტიფიკაციის მიმდევრობით წარუმატებელი მცდელობების მაქსიმალური რაოდენობა, რომლის შედეგად ამ წესის მე-3 მუხლის პირველი პუნქტით გათვალისწინებული ქმედებების მომხმარებლის მიერ განხორციელება დროებით ან სამუდამოდ დაიბლოკება, პროვაიდერის მიერ რისკზე დაფუძნებული მიდგომის საფუძველზე განსაზღვრული პერიოდისთვის არ უნდა აღემატებოდეს ხუთს;

გ) კომუნიკაციის სესიები დაცული უნდა იყოს ავთენტიფიკაციის განხორციელებისას გადაცემული ავთენტიფიკაციის მონაცემების არაუფლებამოსილი მხარეების მიერ წვდომისგან, მოპოვებისგან და ზემოქმედებისგან;

დ) ავთენტიფიცირებული გადამხდელის მიერ თავის საგადახდო ანგარიშზე დისტანციურად ონლაინ რეჟიმში წვდომისას ნებისმიერ პერიოდში უმოქმედობის მაქსიმალური ხანგრძლივობა უწყვეტად არ უნდა აღემატებოდეს 5 წუთს. საგადახდო მომსახურების პროვაიდერი უფლებამოსილია, რისკზე დაფუძნებული მიდგომის საფუძველზე, იურიდიული პირებისთვის აღნიშნული ხანგრძლივობა განსაზღვროს არაუმეტეს 10 წუთით.

5. საბარათე ინსტრუმენტით განხორციელებული ოპერაციების შემთხვევაში ამ მუხლის მე-4 პუნქტის „ა“ ქვეპუნქტით გათვალისწინებული ვალდებულება ვრცელდება მხოლოდ ისეთ შემთხვევებში, როდესაც ოპერაციაში მონაწილე ემიტენტი და ექვაირერი წარმოადგენს საქართველოს ეროვნული ბანკის მიერ ლიცენზირებულ კომერციულ ბანკს და მიკრობანკს, საქართველოს ეროვნული ბანკის მიერ რეგისტრირებულ საგადახდო მომსახურების პროვაიდერს და მიკროსაფინანსო ორგანიზაციას.

6. თუ ამ მუხლის მე-4 პუნქტის „ბ“ ქვეპუნქტით განსაზღვრული ბლოკირება:

ა) დროებითია, მისი ხანგრძლივობა და ხელახალი მცდელობების რაოდენობა უნდა განისაზღვროს გადამხდელისთვის მიწოდებული მომსახურების მახასიათებლებზე და ყველა შესაბამის რისკზე დაყრდნობით, რომელიც უნდა ითვალისწინებდეს, სულ მცირე, ამ წესის მე-3 მუხლის მე-4 პუნქტით განსაზღვრულ ფაქტორებს;

ბ) სამუდამოა, უნდა შემუშავდეს უსაფრთხო პროცედურა, რომელიც გადამხდელისთვის უზრუნველყოფს დაბლოკილი ელექტრონული საგადახდო ინსტრუმენტებისა და ანგარიშებზე წვდომის ელექტრონული არხების ხელახლა გამოყენების საშუალებას.

7. საგადახდო მომსახურების პროვაიდერი ვალდებულია, სამუდამოდ დაბლოკვამდე აღნიშნულის შესახებ შეატყობინოს გადამხდელს.

8. ამ მუხლის მე-4 პუნქტის „ა“ ქვეპუნქტის მოთხოვნა არ ვრცელდება საბარათე ინსტრუმენტის საშუალებით ფიზიკური პოს-ტერმინალისა და ბანკომატის საშუალებით გადახდის ოპერაციის ინიცირებისას.

საქართველოს ეროვნული ბანკის პრეზიდენტის 2023 წლის 27 ივნისის ბრძანება №153/04 - ვებგვერდი, 28.06.2023 წ.



მუხლი 7. დინამიკური კავშირი

1. ელექტრონული გადახდის ოპერაციის ინიცირებისას მომხმარებლის ძლიერი ავთენტიფიკაციის გამოყენებისთვის, საგადახდო მომსახურების პროვაიდერი, ამ წესის მე-6 მუხლის მოთხოვნების შესრულებასთან ერთად, ვალდებულია შეიმუშაოს და დანერგოს უსაფრთხოების ზომები, რომლებიც ითვალისწინებს ყველა შემდეგ მოთხოვნას:

ა) საგადახდო მომსახურების პროვაიდერი ვალდებულია გადამხდელს აჩვენოს ოპერაციის თანხისა და მიმღების შესახებ ინფორმაცია;

ბ) ავთენტიფიკაციის კოდი გენერირებული უნდა იყოს სპეციალურად გადამხდელის მიერ გადახდის ოპერაციის ინიცირებისას დადასტურებული გადახდის ოპერაციის თანხისთვის და მიმღებისთვის;

გ) საგადახდო მომსახურების პროვაიდერის მიერ დადასტურებული ავთენტიფიკაციის კოდი უნდა შეესაბამებოდეს გადამხდელის მიერ დადასტურებულ თავდაპირველ გადახდის ოპერაციის თანხასა და მიმღებს;

დ) გადახდის ოპერაციის თანხის ან მიმღების ცვლილება უნდა იწვევდეს გენერირებული ავთენტიფიკაციის კოდის არავალიდურობას.

2. ამ მუხლის პირველი პუნქტის მიზნებისთვის, საგადახდო მომსახურების პროვაიდერი ვალდებულია შეიმუშაოს და დანერგოს უსაფრთხოების ზომები, რომლითაც უზრუნველყოფილი იქნება შემდეგი ინფორმაციის კონფიდენციალურობა, უცვლელობა და მთლიანობა:

ა) ავთენტიფიკაციის ნებისმიერ ეტაპზე გადახდის ოპერაციის თანხის ოდენობა და მიმღები;

ბ) ავთენტიფიკაციის ნებისმიერ ეტაპზე, მათ შორის, ავთენტიფიკაციის კოდის გენერირების, გადაცემის და გამოყენების პროცესში გადამხდელისთვის ნაჩვენები ინფორმაცია.

3. ამ მუხლის პირველი პუნქტის „ბ“ ქვეპუნქტის მიზნებისთვის საგადახდო მომსახურების პროვაიდერის მიერ მომხმარებლის ძლიერი ავთენტიფიკაციის გამოყენებისას ავთენტიფიკაციის კოდი უნდა აკმაყოფილებდეს შემდეგ მოთხოვნებს:

ა) საბარათე გადახდის ოპერაციის შემთხვევაში, რომლის ინიცირებისთვის გადამხდელი დაეთანხმა განსაზღვრული თანხის დაბლოკვას, ავთენტიფიკაციის კოდი უნდა შეესაბამებოდეს მხოლოდ იმ თანხას, რომლის ოდენობა გადამხდელმა დაადასტურა და მის დაბლოკვას დაეთანხმა გადახდის ოპერაციის ინიცირებისას;

ბ) გადახდის ოპერაციებთან მიმართებაში, რომლებზეც გადამხდელი დაეთანხმა დისტანციური ელექტრონული გადახდის ოპერაციების პაკეტური ფაილის სახით შესრულებას ერთი ან მეტი მიმღების მიმართ, ავთენტიფიკაციის კოდი უნდა შეესაბამებოდეს მხოლოდ ამ გადახდის ოპერაციების პაკეტური ფაილის ჯამურ თანხას და მითითებულ მიმღებს/მიმღებებს.

მუხლი 8. მოთხოვნები ცოდნის კატეგორიის ელემენტების მიმართ

1. საგადახდო მომსახურების პროვაიდერი ვალდებულია შეიმუშაოს და დანერგოს ზომები ამ წესის მე-6 მუხლის პირველი პუნქტით განსაზღვრული ცოდნის კატეგორიის ელემენტების არაუფლებამოსილი პირების მიერ მოპოვების ან ასეთი პირებისთვის მათი გამჟღავნების რისკების შესამცირებლად.

2. საგადახდო მომსახურების პროვაიდერი ვალდებულია შეიმუშაოს და დანერგოს რისკების შემცირების ზომები, რათა თავიდან იქნეს აცილებული გადამხდელის მიერ ცოდნის კატეგორიის ელემენტების გამოყენებისას მათი არაუფლებამოსილი პირებისთვის გამჟღავნება.

მუხლი 9. მოთხოვნები ფლობის კატეგორიის ელემენტების მიმართ

1. საგადახდო მომსახურების პროვაიდერი ვალდებულია შეიმუშაოს და დანერგოს ზომები ამ წესის მე-6 მუხლის პირველი პუნქტით განსაზღვრული ფლობის კატეგორიის ელემენტების არაუფლებამოსილი პირების მიერ გამოყენების რისკების შესამცირებლად.

2. საგადახდო მომსახურების პროვაიდერი ვალდებულია შეიმუშაოს და დანერგოს ზომები, რათა თავიდან იქნეს აცილებული ფლობის ელემენტების რეპლიკაცია.



მუხლი 10. მოთხოვნები უნიკალურობის კატეგორიის ელემენტების მიმართ

1. საგადახდო მომსახურების პროვაიდერი ვალდებულია შეიმუშაოს და დანერგოს ზომები ამ წესის მე-6 მუხლის პირველი პუნქტით განსაზღვრული უნიკალურობის კატეგორიის იმ ელემენტების მიმართ, რომელთა წაკითხვა ხორციელდება გადამხდელისთვის მიწოდებული წვდომის ტექნიკური მოწყობილობისა და პროგრამული უზრუნველყოფის მიერ, არაუფლებამოსილი პირების მიერ ამ ელემენტების მოპოვების რისკების შესამცირებლად.
2. საგადახდო მომსახურების პროვაიდერი ვალდებულია, სულ მცირე, უზრუნველყოს ამ მუხლის პირველ პუნქტში მითითებული მოწყობილობებისა და პროგრამული უზრუნველყოფის მიერ არაუფლებამოსილი პირების გადამხდელად ავთენტიფიკაციის მნიშვნელოვნად დაბალი ალბათობა.
3. საგადახდო მომსახურების პროვაიდერი ვალდებულია გადამხდელის მიერ ამ მუხლის პირველ პუნქტში მითითებული ელემენტების გამოყენების მიმართ შეიმუშაოს და დანერგოს ზომები, რათა თავიდან იქნეს აცილებული მოწყობილობებსა და პროგრამულ უზრუნველყოფაზე არაუფლებამოსილი წვდომით ამ ელემენტების არაუფლებამოსილი გამოყენება.

მუხლი 11. ელემენტების დამოუკიდებლობა

1. საგადახდო მომსახურების პროვაიდერი ვალდებულია ამ წესით განსაზღვრული მომხმარებლის ძლიერი ავთენტიფიკაციის ელემენტების გამოყენების მიმართ შეიმუშაოს და დანერგოს ზომები, ტექნოლოგიის, ალგორითმებისა და პარამეტრების კუთხით, რათა ერთ-ერთი ელემენტის კომპრომეტირების შედეგად სხვა ელემენტების საიმედოობა ექვის ქვეშ არ დადგეს.
2. საგადახდო მომსახურების პროვაიდერი ვალდებულია შეიმუშაოს და დანერგოს უსაფრთხოების ზომები იმ შემთხვევისთვის, თუ მომხმარებლის ძლიერი ავთენტიფიკაციის რომელიმე ელემენტი ან ავთენტიფიკაციის კოდი გამოყენებულია მრავალფუნქციური ტექნიკური მოწყობილობიდან, რათა შემცირებულ იქნეს ასეთი მოწყობილობის კომპრომეტირებით წარმოშობილი რისკები.
3. ამ მუხლის მე-2 პუნქტით განსაზღვრული ზომები ერთდროულად უნდა მოიცავდეს შემდეგს:

- ა) მრავალფუნქციურ ტექნიკურ მოწყობილობაში ჩაწერილი პროგრამული უზრუნველყოფის საშუალებით განცალკევებული უსაფრთხო შესრულების გარემოს გამოყენებას;
- ბ) მექანიზმებს, რათა პროვაიდერი დარწმუნდეს, რომ გადამხდელის ან მესამე მხარის მიერ არ მომხდარა მომხმარებლისთვის მიწოდებული მოწყობილობის ან პროგრამული უზრუნველყოფის მოდიფიკაცია/ცვლილება;
- გ) თუ ადგილი ჰქონდა მომხმარებლისთვის მიწოდებული მოწყობილობის ან პროგრამული უზრუნველყოფის მოდიფიკაციას/ცვლილებას – აღნიშნულიდან გამომდინარე შედეგების შემცირების მექანიზმებს.

თავი III

მომხმარებლის ძლიერი ავთენტიფიკაციის მოთხოვნისგან გამონაკლისი

მუხლი 12. საგადახდო ანგარიშის შესახებ ინფორმაცია

1. საგადახდო მომსახურების პროვაიდერი უფლებამოსილია, ამ მუხლის მე-2 პუნქტის და ამ წესის მე-3 მუხლის მე-2-მე-4 პუნქტების მოთხოვნების დაცვით, არ გამოიყენოს მომხმარებლის ძლიერი ავთენტიფიკაცია იმ შემთხვევაში, თუ მომხმარებელს დისტანციურად ონლაინრეჟიმში აქვს წვდომა მხოლოდ ერთ ან ორივე შემდეგ ინფორმაციაზე (გარდა სენსიტიური საგადახდო მონაცემებისა):
 - ა) მომხმარებლის მიერ განსაზღვრული ერთი ან მეტი საგადახდო ანგარიშის ბალანსზე;
 - ბ) მომხმარებლის მიერ განსაზღვრულ ერთ ან მეტ საგადახდო ანგარიშზე უკანასკნელი 90 კალენდარული დღის განმავლობაში შესრულებულ გადახდის ოპერაციებზე.
2. ამ მუხლის პირველი პუნქტით გათვალისწინებული უფლებამოსილება არ მოქმედებს და საგადახდო მომსახურების პროვაიდერი ვალდებულია განახორციელოს მომხმარებლის ძლიერი ავთენტიფიკაცია, თუ დაკმაყოფილებულია შემდეგი პირობებიდან სულ მცირე ერთ-ერთი:



ა) მომხმარებელი დისტანციურად ონლაინრეჟიმში პირველად ახორციელებს ამ მუხლის პირველი პუნქტით განსაზღვრულ ინფორმაციაზე წვდომას;

ბ) მომხმარებლის მიერ დისტანციურად ონლაინრეჟიმში ამ მუხლის პირველი პუნქტის „ბ“ ქვეპუნქტით განსაზღვრულ ინფორმაციაზე უკანასკნელი წვდომიდან და მომხმარებლის ძლიერი ავთენტიფიკაციის მოთხოვნის შესრულებიდან გავიდა 90 კალენდარულ დღეზე მეტი.

3. საგადახდო მომსახურების პროვაიდერი უფლებამოსილია ამ მუხლის შესაბამისად გამონაკლისით სარგებლობის ფარგლებში საგადახდო ანგარიშის ბალანსზე ან/და შესრულებული გადახდის ოპერაციების შესახებ ინფორმაციაზე წვდომაზე არ გაავრცელოს ამ წესის მე-6 მუხლის მე-4 პუნქტის „დ“ ქვეპუნქტის მოთხოვნა.

4. თუ ამ მუხლის პირველი პუნქტის „ბ“ ქვეპუნქტით განსაზღვრულ ინფორმაციაზე წვდომა განხორციელდა მხოლოდ ცოდნის კატეგორიის ელემენტის გამოყენებით, საგადახდო მომსახურების პროვაიდერი უფლებამოსილია 90 კალენდარულ დღეზე მეტი პერიოდის ოპერაციებზე წვდომისთვის იმავე უწყვეტი სესიის ფარგლებში მომხმარებლის ძლიერი ავთენტიფიკაციისთვის გამოიყენოს ცოდნის კატეგორიის ეს ელემენტი.

მუხლი 13. უკონტაქტო გადახდები საფაქრო/მომსახურების ობიექტებში

საგადახდო მომსახურების პროვაიდერი უფლებამოსილია, ამ წესის მე-3 მუხლის მე-2-მე-4 პუნქტების მოთხოვნების დაცვით, არ გამოიყენოს მომხმარებლის ძლიერი ავთენტიფიკაცია იმ შემთხვევაში, თუ მომხმარებელი ახორციელებს უკონტაქტო ელექტრონული გადახდის ოპერაციის ინიცირებას და დაკმაყოფილებულია შემდეგი დებულებებიდან ერთ-ერთი:

ა) უკონტაქტო ერთი ტრანზაქციის თანხა არ უნდა აღემატებოდეს 150 ლარს ან მის ეკვივალენტს უცხოურ ვალუტაში და მიყოლებით შესრულებული უკონტაქტო გადახდების მაქსიმალური თანხა არ უნდა აღემატებოდეს 600 ლარს, ან მის ეკვივალენტს უცხოურ ვალუტაში;

ბ) უკონტაქტო ერთი ტრანზაქციის თანხა არ უნდა აღემატებოდეს 150 ლარს ან მის ეკვივალენტს უცხოურ ვალუტაში და მიყოლებით შესრულებული უკონტაქტო გადახდების მაქსიმალური რაოდენობა არ უნდა იყოს ოთხზე მეტი.

მუხლი 14. ტრანსპორტით მგზავრობისა და პარკირების საფასურის გადახდისთვის განკუთვნილი თვითმომსახურების ტერმინალი

საგადახდო მომსახურების პროვაიდერი უფლებამოსილია, ამ წესის მე-3 მუხლის მე-2-მე-4 პუნქტების მოთხოვნების დაცვით, არ გამოიყენოს მომხმარებლის ძლიერი ავთენტიფიკაცია იმ შემთხვევაში, თუ ტრანსპორტით მგზავრობისა და პარკირების საფასურის გადახდისთვის განკუთვნილ თვითმომსახურების ტერმინალებში გადამხდელი ახორციელებს ელექტრონული გადახდის ოპერაციის ინიცირებას ისეთი ფიქსირებული საფასურის გადახდის მიზნით, რომლის ოდენობის ცვლილება არ ხდება მომხმარებლის მიერ.

მუხლი 15. სანდო ბენეფიციარების ჩამონათვალი

1. საგადახდო მომსახურების პროვაიდერი ვალდებულია გამოიყენოს მომხმარებლის ძლიერი ავთენტიფიკაცია, თუ გადამხდელი ქმნის ან ცვლის სანდო ბენეფიციარების ჩამონათვალს გადამხდელის ანგარიშის მომსახურე საგადახდო მომსახურების პროვაიდერის საშუალებით.

2. საგადახდო მომსახურების პროვაიდერი უფლებამოსილია, ამ წესის მე-3 მუხლის მე-2-მე-4 პუნქტების მოთხოვნების დაცვით, არ გამოიყენოს მომხმარებლის ძლიერი ავთენტიფიკაცია იმ შემთხვევაში, თუ გადამხდელი ახორციელებს გადახდის ოპერაციის ინიცირებას და ამ ქმედებამდე მიმღები დამატებული იყო გადამხდელის მიერ შექმნილ სანდო ბენეფიციარების ჩამონათვალში. გამონაკლისით სარგებლობა დასაშვებია გადამხდელის მიერ სანდო ბენეფიციარის სიაში დამატებიდან არანაკლებ 24 საათის შემდეგ.

3. ამ მუხლის მიზნებისთვის, სანდო ბენეფიციარი გულისხმობს მიმღებს, რომლის მიმართ მომხმარებელს გააჩნია ნდობა და ძლიერი ავთენტიფიკაციის განხორციელების გარეშე გადახდის ოპერაციის მის მიმართ შესრულება მომხმარებლის შეხედულებით არ არის რისკის შემცველი.



საგადახდო მომსახურების პროვაიდერი ვალდებულია, მომხმარებელს მიაწოდოს ცალსახა და დეტალური ინფორმაცია აღნიშნულის შესახებ.

4. საგადახდო მომსახურების პროვაიდერი უფლებამოსილია, რისკზე დაფუძნებული მიდგომის საფუძველზე, ასევე, მომხმარებლებისგან მიღებული საჩივრების გათვალისწინებით განსაზღვროს ბენეფიციარები, რომლებთან მიმართებაში ის არ ისარგებლებს ამ მუხლით გათვალისწინებული გამონაკლისით.

5. საგადახდო მომსახურების პროვაიდერს არ აქვს უფლება მომხმარებლის მიერ მიმღების რეკვიზიტების დამახსოვრება მიიჩნიოს მომხმარებლის მიერ მიმღების სანდო ბენეფიციარების ჩამონათვალში დამატებად.

მუხლი 16. განმეორებადი/პერიოდული გადახდის ოპერაციები

1. საგადახდო მომსახურების პროვაიდერი ვალდებულია, გამოიყენოს მომხმარებლის ძლიერი ავთენტიფიკაცია, თუ გადამხდელი ქმნის, ცვლის ან პირველად ახორციელებს განმეორებადი/პერიოდული გადახდის ოპერაციების სერიის ინიცირებას.

2. საგადახდო მომსახურების პროვაიდერი უფლებამოსილია, ამ წესის მე-3 მუხლის მე-2-მე-4 პუნქტების მოთხოვნების დაცვით, არ გამოიყენოს მომხმარებლის ძლიერი ავთენტიფიკაცია ამ მუხლის პირველ პუნქტში მითითებულ სერიაში შემავალი ყველა მომდევნო გადახდის ოპერაციის ინიცირებისთვის, თუ განმეორებადი/პერიოდული გადახდის ოპერაციის თანხა და მიმღები უცვლელია.

3. თუ ამ მუხლის მეორე პუნქტით განსაზღვრული მომსახურება გულისხმობს ერთი და იმავე ოდენობის თანხის კონვერტაციით გადახდის ოპერაციის განხორციელებას ერთი და იმავე მიმღების სასარგებლოდ, ამ მუხლის პირველი პუნქტით განსაზღვრული ძლიერი ავთენტიფიკაციის განხორციელებამდე საგადახდო მომსახურების პროვაიდერი ვალდებულია მომხმარებლისთვის ცნობილი გახადოს კონვერტაციის კურსი.

4. საგადახდო მომსახურების პროვაიდერი ასევე უფლებამოსილია, ამ წესის მე-3 მუხლის მე-2-მე-4 პუნქტების მოთხოვნების დაცვით, არ გამოიყენოს მომხმარებლის ძლიერი ავთენტიფიკაცია ამ მუხლის პირველ პუნქტში მითითებულ სერიაში შემავალი ყველა მომდევნო გადახდის ოპერაციის ინიცირებისთვის, თუ განმეორებადი/პერიოდული გადახდის ოპერაციის მიმღები უცვლელია და მომხმარებელს ცალსახად აქვს განსაზღვრული შესასრულებელი ოპერაციების თანხის ოდენობის გამოთვლის პრინციპი.

მუხლი 17. ერთი და იმავე პირის ანგარიშებს შორის საკრედიტო გადარიცხვა

1. საგადახდო მომსახურების პროვაიდერი უფლებამოსილია, ამ წესის მე-3 მუხლის მე-2-მე-4 პუნქტების მოთხოვნების დაცვით, არ გამოიყენოს მომხმარებლის ძლიერი ავთენტიფიკაცია, თუ გადამხდელი ახორციელებს საკრედიტო გადარიცხვის ინიცირებას, როდესაც გადამხდელი და მიმღები ერთი და იგივე პირია და ის ორივე საგადახდო ანგარიშს ფლობს ერთსა და იმავე ანგარიშის მომსახურე საგადახდო მომსახურების პროვაიდერთან.

2. საგადახდო მომსახურების პროვაიდერი უფლებამოსილია ამ მუხლით გათვალისწინებული გამონაკლისით ისარგებლოს იმ შემთხვევაშიც, როდესაც ანგარიშზე წვდომა მომხმარებელმა განახორციელა მხოლოდ ცოდნის ან უნიკალურობის კატეგორიის ელემენტის გამოყენებით. აღნიშნული უფლებამოსილებით სარგებლობას საგადახდო მომსახურების პროვაიდერი უნდა ახორციელებდეს რისკზე დამყარებული მიდგომის საფუძველზე.

მუხლი 18. მცირემოცულობიანი გადახდის ოპერაცია

საგადახდო მომსახურების პროვაიდერი უფლებამოსილია, არ გამოიყენოს მომხმარებლის ძლიერი ავთენტიფიკაცია, თუ გადამხდელი ახორციელებს დისტანციური ელექტრონული გადახდის ოპერაციის ინიცირებას, რომლის თანხა არ აღემატება 50 ლარს ან მის ეკვივალენტს უცხოურ ვალუტაში და დაკმაყოფილებულია შემდეგი დებულებებიდან ერთ-ერთი:

ა) მომხმარებლის ძლიერი ავთენტიფიკაციის მოთხოვნის უკანასკნელად შესრულების შემდგომ გადამხდელის მიერ ინიცირებული დისტანციური ელექტრონული გადახდის ოპერაციების თანხის საერთო ოდენობა არ აღემატება 250 ლარს ან მის ეკვივალენტს უცხოურ ვალუტაში;



ბ) მომხმარებლის ძლიერი ავთენტიფიკაციის მოთხოვნის უკანასკნელად შესრულების შემდგომ გადამხდელის მიერ მიმდევრობით ინიცირებული ინდივიდუალური დისტანციური ელექტრონული გადახდის ოპერაციების რაოდენობა არ აღემატება ხუთს.

მუხლი 19. იურიდიული პირების მიერ გამოყენებული უსაფრთხო პროცესები და პროტოკოლი

საგადახდო მომსახურების პროვაიდერი უფლებამოსილია, არ გამოიყენოს მომხმარებლის ძლიერი ავთენტიფიკაცია იურიდიული პირის მიმართ, რომელიც ახორციელებს ელექტრონული გადახდის ოპერაციის ინიცირებას ისეთი გადახდების სპეციალური პროცესების ან პროტოკოლის საშუალებით, რომლებიც უზრუნველყოფს სულ მცირე ამ წესით მოთხოვნილ უსაფრთხოების ხარისხს.

საქართველოს ეროვნული ბანკის პრეზიდენტის 2023 წლის 25 აგვისტოს ბრძანება №223/04 - ვებგვერდი, 25.08.2023 წ.

მუხლი 20. გადახდის ოპერაციის რისკის ანალიზი

1. საგადახდო მომსახურების პროვაიდერი უფლებამოსილია, არ გამოიყენოს მომხმარებლის ძლიერი ავთენტიფიკაცია, თუ გადამხდელი ახორციელებს დისტანციური ელექტრონული გადახდის იმგვარი ოპერაციის ინიცირებას, რომელიც საგადახდო მომსახურების პროვაიდერის მიერ იდენტიფიცირებულია, როგორც დაბალი რისკის შემცველი ამ მუხლის მე-2 პუნქტის „გ“ ქვეპუნქტში და ამ წესის მე-3 მუხლში მითითებული გადახდის ოპერაციების მონიტორინგის მექანიზმის თანახმად.

2. ამ მუხლის პირველი პუნქტით განსაზღვრული ელექტრონული გადახდის ოპერაცია მიიჩნევა დაბალი რისკის შემცველად, თუ დაკმაყოფილებულია შემდეგი მოთხოვნები:

ა) საგადახდო მომსახურების პროვაიდერის მიერ ანგარიშებით მიწოდებული (შეტყობინებული) და ამ წესის 21-ე მუხლის შესაბამისად დაანგარიშებული თაღლითობის მაჩვენებელი ასეთი ტიპის გადახდის ოპერაციებისთვის არ აღემატება ამ წესის დანართში განსაზღვრულ „დისტანციური ელექტრონული საბარათე გადახდების“ და „დისტანციური ელექტრონული საკრედიტო გადარიცხვების“ მაჩვენებლებს;

ბ) გადახდის ოპერაციის თანხა არ აღემატება გამონაკლისით სარგებლობისთვის ამ წესის დანართით განსაზღვრულ თანხის ზედა ზღვარს;

გ) საგადახდო მომსახურების პროვაიდერის მიერ დროის რეალურ რეჟიმში განხორციელებული რისკების ანალიზის შედეგად არ დაფიქსირებულა:

გ.ა) გადამხდელის ხარჯვისა და ქცევის უჩვეულო თავისებურება;

გ.ბ) გადამხდელის ტექნიკურ მოწყობილობაზე ან პროგრამულ უზრუნველყოფაზე წვდომის შესახებ უჩვეულო ინფორმაცია;

გ.გ) ავთენტიფიკაციის განხორციელების არცერთ სესიაში შეფერხების ან/და დაზიანების გამომწვევი, ასევე ინფორმაციაზე არაუფლებამოსილი წვდომისთვის განკუთვნილი ფარული პროგრამული უზრუნველყოფის არსებობა;

გ.დ) საგადახდო მომსახურების თაღლითობის ცნობილი სცენარები;

გ.ე) გადამხდელის უჩვეულო ადგილმდებარეობა;

გ.ვ) მიმღების მაღალი რისკის შემცველი ადგილმდებარეობა.

3. საგადახდო მომსახურების პროვაიდერი, რომელიც გეგმავს დისტანციური ელექტრონული გადახდის ოპერაციების მომხმარებლის ძლიერი ავთენტიფიკაციის მოთხოვნებისგან გათავისუფლებას ასეთი ოპერაციების დაბალი რისკის საფუძველზე, ვალდებულია გაითვალისწინოს რისკზე დაფუძნებული სულ მცირე შემდეგი ფაქტორები:

ა) საგადახდო მომსახურების კონკრეტული მომხმარებლისთვის დამახასიათებელი ხარჯვის მოდელი;

ბ) საგადახდო მომსახურების პროვაიდერის ყოველი მომხმარებლის გადახდის ოპერაციების ისტორია;

გ) თუ წვდომის ტექნიკური მოწყობილობა ან პროგრამული უზრუნველყოფა საგადახდო მომსახურების პროვაიდერის მიერაა მიწოდებული, გადახდის ოპერაციის მომენტში გადამხდელისა და



მიმღების ადგილმდებარეობა;

დ) მომხმარებლის გადახდის ოპერაციების ისტორიასთან მიმართებაში ამავე მომხმარებლის გადახდის უჩვეულო მოდელის გამოვლენა.

4. ამ მუხლის მე-3 პუნქტის შესაბამისად ოპერაციების შეფასება საგადახდო მომსახურების პროვაიდერის მიერ უნდა განხორციელდეს ყოველი ცალკეული ოპერაციისთვის ამ მუხლის მე-3 პუნქტით განსაზღვრული ყველა ფაქტორის გათვალისწინებით დაანგარიშებული რისკის დონის (ქულის) საფუძველზე.

მუხლი 21. თაღლითობის მაჩვენებლების დაანგარიშება

1. საგადახდო მომსახურების პროვაიდერი ვალდებულია უზრუნველყოს თაღლითობის მაჩვენებლების დაანგარიშება.

2. ამ წესის დანართით განსაზღვრული თითოეული ტიპის გადახდის ოპერაციისთვის, თაღლითობის მაჩვენებლები, რომელიც მოიცავს როგორც მომხმარებლის ძლიერი ავთენტიფიკაციის მოთხოვნების დაცვით შესრულებულ გადახდის ოპერაციებს, ასევე ამ წესის მე-15-მე-20 მუხლებით გათვალისწინებული გამონაკლისების გამოყენებით შესრულებულ გადახდის ოპერაციებს, არ უნდა აღემატებოდეს ამავე ტიპის გადახდის ოპერაციებისთვის ამ წესის დანართით განსაზღვრულ თაღლითობის მაჩვენებელს.

3. ამ წესის დანართით განსაზღვრული თითოეული ტიპის გადახდის ოპერაციისთვის თაღლითობის მაჩვენებელი ყოველკვარტალურად დაანგარიშებული უნდა იყოს, როგორც არავტორიზებული ან/და თაღლითური დისტანციური გადახდის ოპერაციების თანხის მთლიან ოდენობას, მიუხედავად იმისა, მოხდა თუ არა თანხის უკან დაბრუნება, შეფარდებული იმავე ტიპის დისტანციური გადახდის ოპერაციის მთლიანი თანხა. დაანგარიშებისას გათვალისწინებული უნდა იყოს როგორც მომხმარებლის ძლიერი ავთენტიფიკაციის მოთხოვნების დაცვით შესრულებული ოპერაციები, ასევე, ამ წესის მე-15-მე-20 მუხლებით გათვალისწინებული გამონაკლისი ოპერაციები.

4. საგადახდო მომსახურების პროვაიდერის მიერ თაღლითობის მაჩვენებლების დასაანგარიშებლად გამოყენებული მეთოდოლოგია და ნებისმიერი მოდელი, ასევე თავად მიღებული თაღლითობის მაჩვენებლები უნდა იყოს დეტალურად და გარკვევით დოკუმენტირებული. საქართველოს ეროვნული ბანკის მოთხოვნის საფუძველზე, საგადახდო მომსახურების პროვაიდერი ვალდებულია, მიაწოდოს მას აღნიშნული დოკუმენტაცია.

მუხლი 22. გამონაკლისის მოქმედების შეწყვეტა

1. თუ ამ წესის დანართში მითითებული რომელიმე ტიპის გადახდის ოპერაციასთან მიმართებაში დაანგარიშებული თაღლითობის მაჩვენებლები, რომლების მონიტორინგსაც საგადახდო მომსახურების პროვაიდერი ახორციელებს, აღემატება ამავე ცხრილში განსაზღვრულ შესაბამის მაჩვენებლებს, საგადახდო მომსახურების პროვაიდერი, რომელიც სარგებლობს ამ წესის მე-20 მუხლით მითითებული გამონაკლისით, ვალდებულია აღნიშნულის შესახებ დაუყოვნებლივ აცნობოს საქართველოს ეროვნულ ბანკს.

2. საგადახდო მომსახურების პროვაიდერი ვალდებულია საქართველოს ეროვნულ ბანკს მიაწოდოს იმ ზომების აღწერა, რომლების გატარებასაც ის გეგმავს ცხრილში მითითებულ მაჩვენებელთან შესაბამისობის აღსადგენად.

3. საგადახდო მომსახურების პროვაიდერი ვალდებულია დაუყოვნებლივ შეწყვიტოს ამ წესის მე-20 მუხლით გათვალისწინებული გამონაკლისებით სარგებლობა ამ წესის დანართში მითითებული ოპერაციის შესაბამისი თანხის ზღვრული ოდენობის ფარგლებში ნებისმიერი ტიპის გადახდის ოპერაციასთან მიმართებაში, თუ მონიტორინგს დაქვემდებარებული თაღლითობის მაჩვენებელი ორი თანმდევი კვარტალის განმავლობაში აღემატებოდა შესაბამისი გადახდის ოპერაციის ტიპის და თანხის ზღვრული ოდენობისთვის დადგენილ თაღლითობის მაჩვენებელს.

4. ამ მუხლის მე-3 პუნქტის შესაბამისად გამონაკლისით სარგებლობის შეწყვეტის შემდეგ, საგადახდო მომსახურების პროვაიდერი უფლებამოსილია, კვლავ ისარგებლოს გამონაკლისით, თუ დაანგარიშებული თაღლითობის მაჩვენებელი კონკრეტული ტიპის გადახდის ოპერაციისთვის შესაბამისი თანხის ზღვრული ოდენობის ფარგლებში ერთი კვარტალის განმავლობაში არ აღემატებოდა ამ წესის დანართში მითითებულ თაღლითობის მაჩვენებელს.



5. თუ საგადახდო მომსახურების პროვაიდერი გეგმავს ამ წესის მე-20 მუხლში მითითებული გამონაკლისებით კვლავ სარგებლობას, ის ვალდებულია საქართველოს ეროვნულ ბანკს წინასწარ, 10 კალენდარული დღით ადრე, აცნობოს აღნიშნულის შესახებ და მიაწოდოს მონიტორინგს დაქვემდებარებული თაღლითობის მაჩვენებლის ამ წესით განსაზღვრულ მაჩვენებელთან შესაბამისობის დამადასტურებელი ინფორმაცია.

მუხლი 23. მონიტორინგი

1. ამ წესის მე-12–მე-20 მუხლებით გათვალისწინებული გამონაკლისებით სარგებლობისთვის, საგადახდო მომსახურების პროვაიდერი ვალდებულია სულ მცირე კვარტალში ერთხელ განხორციელოს გადახდის ოპერაციის ყოველი ტიპის, დისტანციური და არადისტანციური გადახდის ოპერაციების გამოყენებით, შემდეგი მონაცემების შენახვა და მონიტორინგი:

ა) არავტორიზებული და თაღლითური გადახდის ოპერაციების მთლიანი თანხა, ასევე, ყველა გადახდის ოპერაციის მთლიანი თანხა და დაანგარიშებული თაღლითობის მაჩვენებელი, მათ შორის, მომხმარებლის ძლიერი ავთენტიფიკაციის მოთხოვნების დაცვით და თითოეული გამონაკლისის გამოყენებით შესრულებული ოპერაციის ჭრილში;

ბ) გადახდის ოპერაციის საშუალო თანხა, მათ შორის, მომხმარებლის ძლიერი ავთენტიფიკაციის მოთხოვნების შესრულებით და თითოეული გამონაკლისის ოპერაციის ჭრილში;

გ) გამონაკლისების გამოყენებით განხორციელებული გადახდის ოპერაციების რაოდენობა და გამონაკლისის ტიპების მიხედვით ამგვარი ოპერაციების პროცენტული წილი გადახდის ოპერაციების მთლიან რაოდენობაში.

2. საქართველოს ეროვნული ბანკის მოთხოვნის საფუძველზე, საგადახდო მომსახურების პროვაიდერი ვალდებულია, ამ მუხლის პირველი პუნქტის შესაბამისად განხორციელებული მონიტორინგის შედეგები მიაწოდოს საქართველოს ეროვნულ ბანკს.

თავი III¹

სპეციალური მოთხოვნები თაღლითური ელექტრონული გადახდის ოპერაციის პრევენციის მიზნით
საქართველოს ეროვნული ბანკის პრეზიდენტის 2026 წლის 8 აპრილის ბრძანება №88/04 - ვებგვერდი, 14.04.2026 წ.

მუხლი 23¹. მომხმარებელთა დაცვის სპეციალური მოთხოვნები

1. საგადახდო მომსახურების პროვაიდერი ვალდებულია თაღლითური ქმედებისგან დაცვის და ამგვარი ელექტრონული გადახდის ოპერაციის პრევენციის მიზნით, მომხმარებელთა ჯგუფისთვის, რომელთა ასაკი აღემატება 60 წელს, ამ წესით გათვალისწინებულ მონიტორინგის მექანიზმებში დანერგოს დაცვის სპეციალური ზომები, რომლებიც უნდა ეფუძნებოდეს მომხმარებლის ინდივიდუალურ ქცევით პროფილს.

2. ამ მუხლის პირველი პუნქტის შესაბამისად დანერგილი დაცვის სპეციალური ზომები საგადახდო მომსახურების პროვაიდერს უნდა აძლევდეს მომხმარებლის მიერ ინიცირებული ელექტრონული გადახდის ოპერაციის შესრულების შეჩერების ან, სადაც აღნიშნული შეუძლებელია, საგადახდო დავალების შესრულებაზე უარის თქმის ტექნიკურ შესაძლებლობას. ამ მიზნით, დაცვის სპეციალური ზომები უნდა ეფუძნებოდეს, სულ მცირე, რისკზე დაფუძნებულ შემდეგ გარემოებებს:

ა) გადახდის ოპერაციის თანხა აღემატება 500 ლარს;

ბ) გადახდის ოპერაციის შინაარსი დაკავშირებულია თაღლითობის მაღალი რისკის პროფილის საქმიანობებთან, მათ შორის, ონლაინ სავაჭრო ე.წ. „ფორექსი“, საინვესტიციო, სათამაშო ბიზნესთან ან ვირტუალურ აქტივებთან დაკავშირებულ საქმიანობებთან. აღნიშნული საქმიანობის განმახორციელებელი სუბიექტების იდენტიფიცირება საბარათე ოპერაციებისას უნდა განხორციელდეს საბარათე სქემის მიერ განსაზღვრული სუბიექტის საქმიანობის მაიდენტიფიცირებელი კოდის (MCC) საშუალებით;

გ) ამ წესის მე-20 მუხლის მე-3 პუნქტის „ა“, „ბ“ ან „დ“ ქვეპუნქტებით განსაზღვრული ფაქტორების შეფასების საფუძველზე გამოვლენილია მომხმარებლის ხარჯვის და ქცევის უჩვეულო თავისებურება.



3. საგადახდო მომსახურების პროვაიდერი უფლებამოსილია მომხმარებლის დაბადების თარიღზე ინფორმაცია მიიღოს საჯარო სამართლის იურიდიული პირის – სახელმწიფო სერვისების განვითარების სააგენტოს მონაცემთა ელექტრონული ბაზიდან, საქართველოს კანონმდებლობით დადგენილი წესით მოპოვებული პირის შესაბამისი მონაცემებით (ინფორმაციით).

4. ამ მუხლის მე-2 პუნქტით განსაზღვრული ყველა გარემოების ერთდროულად არსებობის შემთხვევაში, საგადახდო მომსახურების პროვაიდერი ვალდებულია:

ა) 48 საათით შეაჩეროს მომხმარებლის მიერ ინიცირებული ელექტრონული გადახდის ოპერაცია;

ბ) თუ ტექნიკური ან საგადახდო სისტემის სპეციფიკიდან გამომდინარე, მომხმარებლის მიერ ინიცირებული ელექტრონული გადახდის ოპერაციის შეჩერება შეუძლებელია, 48 საათით უარი განაცხადოს შესაბამისი საგადახდო დავალების შესრულებაზე;

გ) პირველივე შესაძლებლობისთანავე დაუკავშირდეს მომხმარებელს და მასთან კომუნიკაციისას დაიცვას საქართველოს ეროვნული ბანკის პრეზიდენტის 2021 წლის 9 მარტის №32/04 ბრძანებით დამტკიცებული „ფინანსური ორგანიზაციების მიერ მომსახურების გაწევისას მომხმარებელთა უფლებების დაცვის წესის“ დანართ №13-ით განსაზღვრული მოთხოვნები;

დ) შეჩერებული ელექტრონული გადახდის ოპერაციის შესრულებაზე მომხმარებლისგან დამატებითი, ცალსახა თანხმობის მიღებისა და 48-საათიანი შეჩერების ვადის გასვლის შემდეგ შეასრულოს შესაბამისი საგადახდო დავალება, ხოლო ამავე პუნქტის „ბ“ ქვეპუნქტის შესაბამისად საგადახდო დავალების შესრულებაზე უარის თქმის შემთხვევაში მისცეს მას შესაძლებლობა ხელახლა დააინიციროს აღნიშნული ელექტრონული გადახდის ოპერაცია;

ე) შეჩერებული ელექტრონული გადახდის ოპერაციის შესრულებაზე მომხმარებლისგან უარის მიღების ან ელექტრონული გადახდის ოპერაციის შეჩერების პერიოდში მომხმარებელთან დაკავშირების/კომუნიკაციის შეუძლებლობის შემთხვევაში არ შეასრულოს შესაბამისი საგადახდო დავალება. ამასთან, მომხმარებელი არ არის შეზღუდული ხელახლა დააინიციროს აღნიშნული ელექტრონული გადახდის ოპერაცია.

5. ამ მუხლით გათვალისწინებული მოთხოვნები არ ვრცელდება საბარათე ინსტრუმენტით ფიზიკური პოსტერმინალის საშუალებით განხორციელებულ გადახდის ოპერაციაზე.

საქართველოს ეროვნული ბანკის პრეზიდენტის 2026 წლის 8 აპრილის ბრძანება №88/04 - ვებგვერდი, 14.04.2026 წ.

საქართველოს ეროვნული ბანკის პრეზიდენტის 2026 წლის 27 აგვისტოს ბრძანება №208/04 - ვებგვერდი, 31.08.2026 წ.

თავი IV

მომხმარებლის უსაფრთხოების პერსონიფიცირებული მახასიათებლების კონფიდენციალობისა და მთლიანობის დაცვა

მუხლი 24. ზოგადი მოთხოვნები

1. საგადახდო მომსახურების პროვაიდერმა ავთენტიფიკაციის ყველა ეტაპზე უნდა უზრუნველყოს მომხმარებლის უსაფრთხოების პერსონიფიცირებული მახასიათებლების, მათ შორის, ავთენტიფიკაციის კოდების კონფიდენციალობა და მთლიანობა.

2. ამ მუხლის პირველი პუნქტის მიზნებისთვის, საგადახდო მომსახურების პროვაიდერი ვალდებულია უზრუნველყოს თითოეული შემდეგი მოთხოვნის შესრულება:

ა) ავთენტიფიკაციის განხორციელებისას უსაფრთხოების პერსონიფიცირებული მახასიათებლები უნდა იყოს შენიღბულად ნაჩვენები და მომხმარებლის მიერ მათი შეყვანისას შეუძლებელი უნდა იყოს მათი სრულად წაკითხვა;

ბ) უსაფრთხოების პერსონიფიცირებული მახასიათებლები მონაცემთა ფორმატში, ასევე კრიპტოგრაფიული მასალა, რომელიც კავშირშია უსაფრთხოების პერსონიფიცირებული მახასიათებლების შიფრაციასთან, არ უნდა იყოს შენახული დაუშიფრავი ტექსტის ფორმატში;



გ) საიდუმლო კრიპტოგრაფიული მასალა დაცულია არაუფლებამოსილი გამჟღავნებისგან.

3. საგადახდო მომსახურების პროვაიდერი ვალდებულია უზრუნველყოს უსაფრთხოების პერსონიფიცირებული მახასიათებლების შიფრაციისთვის ან მათი სხვაგვარად შენიღბულად ჩვენებისთვის გამოყენებული კრიპტოგრაფიული მასალის მართვასთან დაკავშირებული პროცესის სრულად დოკუმენტირება.

4. საგადახდო მომსახურების პროვაიდერმა უნდა უზრუნველყოს უსაფრთხოების პერსონიფიცირებული მახასიათებლებისა და ამ წესის II თავის შესაბამისად გენერირებული ავთენტიფიკაციის კოდების დაცულ გარემოში ძლიერი და ფართოდ აღიარებული სტანდარტების შესაბამისად დამუშავება და გადაცემა.

მუხლი 25. უსაფრთხოების პერსონიფიცირებული მახასიათებლების შექმნა და გადაცემა

1. საგადახდო მომსახურების პროვაიდერი ვალდებულია უზრუნველყოს უსაფრთხოების პერსონიფიცირებული მახასიათებლების დაცულ გარემოში შექმნა.

2. საგადახდო მომსახურების პროვაიდერი ვალდებულია უზრუნველყოს უსაფრთხოების პერსონიფიცირებული მახასიათებლების, ავთენტიფიკაციის მოწყობილობების და პროგრამული უზრუნველყოფის არაუფლებამოსილი გამოყენების რისკების შემცირება, რაც წარმოიქმნა გადამხდელისთვის მიწოდებამდე მათი დაკარგვით, მოპარვით ან ასლის დამზადებით.

მუხლი 26. მომხმარებელთან დაკავშირება

1. საგადახდო მომსახურების პროვაიდერი ვალდებულია უზრუნველყოს მხოლოდ ერთი მომხმარებლის დაცული გზით კავშირი უსაფრთხოების პერსონიფიცირებულ მახასიათებლებთან, ავთენტიფიკაციის მოწყობილობებსა და პროგრამულ უზრუნველყოფასთან.

2. ამ მუხლის პირველი პუნქტის მიზნებისთვის, საგადახდო მომსახურების პროვაიდერი ვალდებულია, უზრუნველყოს თითოეული შემდეგი მოთხოვნის შესრულება:

ა) მომხმარებლის დაკავშირება უსაფრთხოების პერსონიფიცირებულ მახასიათებლებთან, ავთენტიფიკაციის მოწყობილობებთან და პროგრამულ უზრუნველყოფასთან ხორციელდება საგადახდო მომსახურების პროვაიდერის პასუხისმგებლობის ქვეშ არსებულ დაცულ გარემოში, რაც, სულ მცირე, გულისხმობს საგადახდო მომსახურების პროვაიდერის ოფისებს, მის მიერ უზრუნველყოფილ ინტერნეტ გარემოს, ან მის მიერ გამოყენებულ სხვა მსგავს დაცულ ვებ-გვერდებს და მის ბანკომატების სისტემას და, ასევე, ითვალისწინებს დაკავშირების პროცესში გამოყენებულ იმ ტექნიკურ მოწყობილობებთან და სხვა კომპონენტებთან დაკავშირებულ რისკებს, რომლებიც არ არის საგადახდო მომსახურების პროვაიდერის პასუხისმგებლობის ქვეშ;

ბ) დისტანციური არხის მეშვეობით მომხმარებლის დაკავშირება უსაფრთხოების პერსონიფიცირებულ მახასიათებლებთან, ავთენტიფიკაციის მოწყობილობებთან და პროგრამულ უზრუნველყოფასთან ხორციელდება მომხმარებლის ძლიერი ავთენტიფიკაციის გამოყენებით.

მუხლი 27. უსაფრთხოების პერსონიფიცირებული მახასიათებლების, ავთენტიფიკაციის მოწყობილობების და პროგრამული უზრუნველყოფის მიწოდება

1. საგადახდო მომსახურების პროვაიდერი ვალდებულია უსაფრთხოების პერსონიფიცირებული მახასიათებლები, ავთენტიფიკაციის მოწყობილობები და პროგრამული უზრუნველყოფა მომხმარებელს მიაწოდოს დაცული გზით, რითაც უზრუნველყოფილი იქნება მათი დაკარგვით, მოპარვით ან ასლის დამზადებით გამოწვეული არაუფლებამოსილი გამოყენების რისკების შემცირება.

2. ამ მუხლის პირველი პუნქტის მიზნებისთვის, საგადახდო მომსახურების პროვაიდერი ვალდებულია შეიმუშაოს და დანერგოს, სულ მცირე, შემდეგი მექანიზმები და ზომები:

ა) ეფექტური და დაცული მიწოდების მექანიზმები, რომლებიც უზრუნველყოფს უსაფრთხოების პერსონიფიცირებული მახასიათებლების, ავთენტიფიკაციის მოწყობილობებისა და პროგრამული უზრუნველყოფის საგადახდო მომსახურების უფლებამოსილი მომხმარებლისთვის მიწოდებას;

ბ) მექანიზმები, რომლებიც საგადახდო მომსახურების პროვაიდერს საშუალებას აძლევს შეამოწმოს მომხმარებელთან ინტერნეტის საშუალებით მიწოდებული ავთენტიფიკაციის პროგრამული უზრუნველყოფის უცვლელობა;



გ) ზომები იმ შემთხვევისთვის, თუ უსაფრთხოების პერსონიფიცირებული მახასიათებლების მიწოდება არ ხდება საგადახდო მომსახურების პროვაიდერის ოფისებში, ან ხდება დისტანციური არხის მეშვეობით, და ერთდროულად დაცულია შემდეგი მოთხოვნები:

გ.ა) თუ მიწოდება ხდება ერთი და იმავე არხის მეშვეობით, არც ერთ არაუფლებამოსილ მხარეს არ შეუძლია ერთზე მეტი უსაფრთხოების პერსონიფიცირებული მახასიათებლის, ავთენტიფიკაციის მოწყობილობის ან პროგრამული უზრუნველყოფის პარამეტრის მიღება;

გ.ბ) მიწოდებული უსაფრთხოების პერსონიფიცირებული მახასიათებლები, ავთენტიფიკაციის მოწყობილობები ან პროგრამული უზრუნველყოფა გამოყენებამდე მოითხოვს აქტივაციას.

დ) ზომები, რომლებიც უსაფრთხოების პერსონიფიცირებული მახასიათებლების, ავთენტიფიკაციის მოწყობილობების ან პროგრამული უზრუნველყოფის პირველად გამოყენებამდე აქტივაციის საჭიროების შემთხვევაში უზრუნველყოფს ამ წესის 26-ე მუხლით გათვალისწინებული მოთხოვნების დაცვით აქტივაციის პროცესის დაცულ გარემოში განხორციელებას.

მუხლი 28. უსაფრთხოების პერსონიფიცირებული მახასიათებლების განახლება

საგადახდო მომსახურების პროვაიდერი ვალდებულია უზრუნველყოს უსაფრთხოების პერსონიფიცირებული მახასიათებლების განახლება ან ხელმეორედ აქტივაცია ამ წესის 25-ე-27-ე მუხლებით გათვალისწინებული მოთხოვნების დაცვით.

მუხლი 29. განადგურება, დეაქტივაცია და გაუქმება

საგადახდო მომსახურების პროვაიდერი ვალდებულია უზრუნველყოს ეფექტური პროცესები ყველა შემდეგი უსაფრთხოების ზომის გამოყენებისთვის:

ა) უსაფრთხოების პერსონიფიცირებული მახასიათებლების, ავთენტიფიკაციის ტექნიკური მოწყობილობებისა და პროგრამული უზრუნველყოფის დაცული განადგურება, დეაქტივაცია ან/და გაუქმება;

ბ) თუ საგადახდო მომსახურების პროვაიდერი ახორციელებს უკვე გამოყენებული ავთენტიფიკაციის ტექნიკური მოწყობილობებისა და პროგრამული უზრუნველყოფის მიწოდებას, ის ვალდებულია, სხვა მომხმარებლისთვის მათ გადაცემამდე უზრუნველყოს მათი ხელმეორედ უსაფრთხო გამოყენების ზომების შემუშავება, დოკუმენტირება და დანერგვა;

გ) უსაფრთხოების პერსონიფიცირებულ მახასიათებლებთან დაკავშირებული ინფორმაციის დეაქტივაცია ან გაუქმება, რომელიც იწახება საგადახდო მომსახურების პროვაიდერის საკუთარ ან/და აუთსორსინგულ სისტემებში და ბაზებში.

თავი V პროვაიდერის პასუხისმგებლობა

მუხლი 30. საგადახდო მომსახურების პროვაიდერის პასუხისმგებლობა

1. თუ გადამხდელის საგადახდო მომსახურების პროვაიდერს დანერგილი აქვს მომხმარებლის ძლიერი ავთენტიფიკაციის მექანიზმი და მისი მოთხოვნის შემთხვევაში მიმღების საგადახდო მომსახურების პროვაიდერი ვერ უზრუნველყოფს გადახდის ოპერაციის შესრულებისას მომხმარებლის ძლიერი ავთენტიფიკაციის მხარდაჭერას, ის ვალდებულია, გადამხდელის საგადახდო მომსახურების პროვაიდერს აუნაზღაუროს ფინანსური ზიანი არაუმეტეს გადამხდელისთვის ანაზღაურებული ოპერაციის თანხისა. თუ ძლიერი ავთენტიფიკაციის მხარდაჭერა არ განხორციელდა მხოლოდ მიმღების მიზეზით, პასუხისმგებლობა რეგულირდება მიმღებსა და მიმღების პროვაიდერს შორის გაფორმებული ხელშეკრულების საფუძველზე.

2. თუ ამ წესის მე-19 მუხლით განსაზღვრული იურიდიული პირი საგადახდო მომსახურების პროვაიდერია და გადახდების სპეციალური პროცესი/პროტოკოლი გამოიყენება მის მიერ საგადახდო მომსახურების განხორციელების მიზნით ელექტრონული გადახდის ოპერაციის შესრულებისთვის, ასეთ შემთხვევაში საგადახდო მომსახურების პროვაიდერებს შორის პასუხისმგებლობა და მოვალეობები რეგულირდება მათ შორის გაფორმებული ხელშეკრულებით. ამასთან, ხელშეკრულებით დაუშვებელია, გადახდების სპეციალური პროცესის/პროტოკოლის ხარვეზებით მუშაობის ან/და მისი სისუსტეების მიზეზით განხორციელებული არავტორიზებული, არასწორად ან დაგვიანებით



შესრულებული, ასევე შეუსრულებელი ოპერაციებისათვის პასუხისმგებლობა დაეკისროს ამ წესის მე-19 მუხლით განსაზღვრულ იურიდიულ პირს, რომელიც საგადახდო მომსახურების პროვაიდერია.

საქართველოს ეროვნული ბანკის პრეზიდენტის 2023 წლის 25 აგვისტოს ბრძანება №223/04 - ვებგვერდი, 25.08.2023 წ.

თავი VI გარდამავალი დებულებები

მუხლი 31. გარდამავალი დებულებები

1. საბარათე ინსტრუმენტებით განხორციელებულ ელექტრონული კომერციის ოპერაციებთან მიმართებაში:

ა) ექვარიერი ვალდებულია არაუგვიანეს 2020 წლის 1 ნოემბრისა უზრუნველყოს ერთჯერადი კოდის, როგორც ავთენტიფიკაციის ელემენტის გამოყენების შესაძლებლობა;

ბ) ექვარიერი ვალდებულია 2020 წლის 1 ნოემბრის შემდეგ მაღალი რისკის მიმდებარების შემთხვევაში ოპერაცია (მათ შორის, დამახსოვრებული საბარათე ინსტრუმენტის რეკვიზიტებით როგორც პირველი, ასევე მომდევნო ოპერაციები) განახორციელოს მომხმარებლის მიერ ოპერაციის ერთჯერადი კოდით დადასტურების საფუძველზე, თუ ემიტენტს დანერგილი აქვს ერთჯერადი კოდის შესაბამისი უზრუნველყოფა; 2021 წლის 1 იანვრიდან, ემიტენტმა და ექვარიერმა მაღალი რისკის მიმდებარების შემთხვევაში უნდა უზრუნველყონ ოპერაციის შესრულება მხოლოდ მომხმარებლის მიერ ოპერაციის ერთჯერადი კოდით დადასტურების საფუძველზე;

გ) ექვარიერი ვალდებულია ამ წესის ამოქმედებიდან 15 დღის ვადაში უზრუნველყოს მომხმარებლების წინასწარი ინფორმირება ერთჯერადი კოდის გამოყენების თაობაზე;

დ) საგადახდო მომსახურების პროვაიდერი (ემიტენტი და ექვარიერი) ვალდებულია არაუგვიანეს 2027 წლის 1 იანვრისა უზრუნველყოს ელექტრონული კომერციის ოპერაციებისთვის ამ წესის მოთხოვნების შესაბამისი მექანიზმების, ასევე საქართველოს ეროვნულ ბანკთან შეთანხმებული სხვა უსაფრთხო მოდელის დანერგვა, რომლითაც შესაძლებელი იქნება ამ წესის მიზნების შესრულება, მათ შორის, ელექტრონული კომერციის ოპერაციებთან დაკავშირებული თაღლითობისა და სხვა უკანონო ქმედების რისკების შემცირება;

ე) საგადახდო მომსახურების პროვაიდერები (ემიტენტი და ექვარიერი) ვალდებული არიან ერთობლივად შეიმუშაონ და არაუგვიანეს 2026 წლის 30 ივნისისა საქართველოს ეროვნულ ბანკს შესათანხმებლად წარუდგინონ ამ პუნქტის „დ“ ქვეპუნქტით განსაზღვრული მოდელი და წინადადება/წინადადებები ელექტრონული კომერციის ოპერაციებისთვის იმავე ქვეპუნქტით გათვალისწინებული მექანიზმებისა და მოდელის გამოყენებასთან დაკავშირებით.

2. დისტანციური არხის (ვებგვერდის ან მობილური აპლიკაციის) საშუალებით საგადახდო ანგარიშებზე წვდომასთან და ამ არხების საშუალებით განხორციელებულ გადახდის ოპერაციებთან მიმართებაში, გარდა საბარათე ინსტრუმენტით განხორციელებული ოპერაციებისა, საგადახდო მომსახურების პროვაიდერი ვალდებულია ამ წესთან შესაბამისობა უზრუნველყოს არაუგვიანეს 2021 წლის 22 მარტისა.

3. უცხო ქვეყნის საგადახდო მომსახურების პროვაიდერის მიერ გამოშვებულ საბარათე ინსტრუმენტებთან მიმართებაში, საგადახდო მომსახურების პროვაიდერი 2027 წლის 1 იანვრამდე უფლებამოსილია იმოქმედოს რისკზე დაფუძნებული მიდგომის საფუძველზე.

4. 2027 წლის 1 იანვრამდე ემიტენტი უფლებამოსილია უცხოური ექვარიერის მომსახურებაში მყოფი სავაჭრო/მომსახურების ობიექტებთან მისი მომხმარებლების მიერ განხორციელებულ საბარათე ოპერაციებთან მიმართებაში იმოქმედოს რისკზე დაფუძნებული მიდგომის საფუძველზე.

5. ამ წესის ამოქმედების შემდეგ საგადახდო მომსახურების პროვაიდერი ვალდებულია, გამოუშვას მხოლოდ ისეთი საბარათე ინსტრუმენტები, რომლებიც სრულად უზრუნველყოფს ამ წესის მოთხოვნებთან შესაბამისობას.

6. არაუგვიანეს 2021 წლის 1 სექტემბრისა საგადახდო მომსახურების პროვაიდერი ვალდებულია, გამოშვებული საბარათე ინსტრუმენტები, რომლებიც არ აკმაყოფილებს ამ წესის მოთხოვნებს,



ჩანაცვლოს ისეთი საბარათე ინსტრუმენტებით, რომლებიც სრულად უზრუნველყოფს ამ წესის მოთხოვნებთან შესაბამისობას. თუ მომხმარებლის საგადახდო ინსტრუმენტის მოქმედების ვადა არ არის ამოწურული, ემიტენტი უფლებამოსილია, მომხმარებელს ჩანაცვლებისთვის გადაახდევინოს არაუმეტეს საგადახდო ინსტრუმენტის თვითღირებულებისა.

7. საგადახდო მომსახურების პროვაიდერი უფლებამოსილია, ამ წესის მე-20 მუხლით განსაზღვრული მონიტორინგის მექანიზმების დანერგვამდე, საბარათე გადახდის ოპერაციების შემთხვევაში – არაუგვიანეს 2024 წლის 1 აპრილისა, ხოლო სხვა გადახდის ოპერაციების შემთხვევაში – არაუგვიანეს 2023 წლის 1 ივნისისა, რისკის დონე შეაფასოს არსებული გამოცდილების, მათ შორის, მომხმარებლების საჩივრების გათვალისწინებით. მონიტორინგის მექანიზმების დანერგვის შემდეგ საგადახდო მომსახურების პროვაიდერი ვალდებულია ნებისმიერი ოპერაციის რისკის დონე გადააფასოს ამ წესის მოთხოვნების შესაბამისად.

8. 2027 წლის 1 იანვრამდე საგადახდო მომსახურების პროვაიდერი უფლებამოსილია, საქართველოს კანონმდებლობით დადგენილი წესით, მომხმარებელთან სახელშეკრულებო ურთიერთობისა და მომხმარებლის მიერ გაცემული თანხმობის საფუძველზე შეამოწმოს მომხმარებლის მიერ მითითებული აბონენტის ნომრით ან სხვა იდენტიფიკატორით საყოფაცხოვრებო მომსახურების ორგანიზაციებთან არსებული დავალიანება და განახორციელოს გადახდის ოპერაციის ინიცირება არაუმეტეს დავალიანების ოდენობის თანხისა. აღნიშნული თანხმობის გაცემა და გაუქმება უნდა განხორციელდეს მომხმარებლის ძლიერი ავთენტიფიკაციით. საგადახდო მომსახურების პროვაიდერი უფლებამოსილია მომხმარებელს მიაწოდოს მომსახურება, თუ მომხმარებელმა შესაძლო ვარიანტებიდან თავად აირჩია თანხმობის მოქმედების ვადა ან გასცა თანხმობა განუსაზღვრელი ვადით და განსაზღვრა თანხის ზედა ზღვარი. ამ პუნქტით გათვალისწინებულ შემთხვევაში მონიტორინგის მექანიზმის მიმართ არ მოქმედებს ამ წესის მე-20 მუხლით განსაზღვრული გადახდის ოპერაციის თანხობრივი სიდიდიდან გამომდინარე მოთხოვნები.

9. საგადახდო მომსახურების პროვაიდერი, რომელიც მომხმარებლებისთვის ახორციელებს ამ მუხლის მე-8 პუნქტით გათვალისწინებულ მომსახურებას ამ წესის ამოქმედებამდე მიღებული თანხმობის საფუძველზე და ამ თანხმობის მოქმედების ვადა განსაზღვრული არ არის, ვალდებულია 2021 წლის 1 მარტამდე უზრუნველყოს თითოეული ასეთი მომხმარებლის შესაბამისი თანხმობის განახლება ძლიერი ავთენტიფიკაციის საფუძველზე. ამ პუნქტის შესაბამისად განახლებული თანხმობა უნდა მოიცავდეს მისი მოქმედების ვადას და თანხის ზედა ზღვარს. ეს პუნქტი არ ვრცელდება თუ ამ წესის ამოქმედებამდე მომხმარებელმა შესაძლო ვარიანტებიდან თავად აირჩია თანხმობის მოქმედების ვადა ან გასცა თანხმობა განუსაზღვრელი ვადით.

10. პროვაიდერი, რომელიც მომხმარებელს საგადახდო მომსახურებას სთავაზობს თავისი ვებგვერდის მეშვეობით, უფლებამოსილია მომხმარებელს მისცეს საშუალება თავის ელექტრონულ საფულეს/ვებგვერდზე დარეგისტრირებულ მომხმარებლის იდენტიფიკატორს მიაბას საგადახდო (საბარათე ან/და სხვა) ინსტრუმენტი. საგადახდო ინსტრუმენტის მიბმა ხორციელდება საფულის შევსების ან/და საფულიდან ინსტრუმენტზე თანხის გადატანის მიზნით, ასევე გადახდის ოპერაციის ერთჯერადად განხორციელების მიზნით. ამ პუნქტით გათვალისწინებული საგადახდო ინსტრუმენტის მიბმის ოპერაცია უნდა განხორციელდეს ემიტენტის მიერ მომხმარებლის ძლიერი ავთენტიფიკაციის ან 2027 წლის 1 იანვრამდე ერთჯერადი კოდის გამოყენების საფუძველზე, გარდა უცხო ქვეყნის საგადახდო მომსახურების პროვაიდერის მიერ გამოშვებული საგადახდო ინსტრუმენტისა. იდენტიფიცირებული მომხმარებლის შემთხვევაში, საფულის შევსების ან გადახდის ოპერაციის ერთჯერადად შესრულების მიზნით საგადახდო ინსტრუმენტით ოპერაციის ინიცირებისას, ემიტენტის მიერ ძლიერი ავთენტიფიკაციის განხორციელება (ან ერთჯერადი კოდის გენერირება) არ მოითხოვება. აღნიშნულ შემთხვევებში ელექტრონულ საფულეზე წვდომა ან ვებგვერდზე რეგისტრირებული მომხმარებლის მონაცემებზე წვდომა უნდა განხორციელდეს პროვაიდერის მიერ მომხმარებლის ძლიერი ავთენტიფიკაციის საფუძველზე. არაიდენტიფიცირებული მომხმარებლის შემთხვევაში, ვებგვერდიდან საგადახდო ინსტრუმენტით ოპერაციის ინიცირებისას, საგადახდო მომსახურების პროვაიდერმა საგადახდო ინსტრუმენტის გამომშვები პროვაიდერისგან უნდა მოითხოვოს ძლიერი ავთენტიფიკაციის განხორციელება ან ერთჯერადი კოდის გამოყენება. ამ პუნქტის დარღვევით განხორციელებულ ოპერაციებზე საგადახდო ინსტრუმენტის გამომშვები პროვაიდერის და მომხმარებლის წინაშე პასუხისმგებლობა ეკისრება ვებგვერდით მომსახურე პროვაიდერს (მათ შორის, ელექტრონული ფულის პროვაიდერს).



11. 2027 წლის 1 იანვრამდე, საგადახდო მომსახურების პროვაიდერი უფლებამოსილია:

ა) ამ წესის მე-13 მუხლის მიზნებისთვის დათვლაში არ გაითვალისწინოს არანაკლებ 24 საათის განმავლობაში, 300.01 ლარამდე ჯამური ოდენობით ძლიერი ავთენტიფიკაციის გარეშე განხორციელებული გადახდის ოპერაციები, რომელთაგან თითოეული ოპერაციის თანხა არ უნდა აღემატებოდეს 50 ლარს;

ბ) ოფლაინგადახდის ოპერაცია არ გაითვალისწინოს ამ წესის მე-13 მუხლის, ასევე, ამ პუნქტის „ა“ ქვეპუნქტის მიზნებისთვის დათვლაში, თუ ოფლაინ რეჟიმიდან გამომდინარე, ამის ტექნიკური შესაძლებლობა არ არის. ასეთი შესაძლებლობის არარსებობის დასაბუთების ვალდებულება ეკისრება ემიტენტ საგადახდო მომსახურების პროვაიდერს.

12. საგადახდო მომსახურების პროვაიდერი ვალდებულია ამ წესის მე-13 მუხლით გათვალისწინებული უფლებამოსილების გამოყენების მიზნით მიყოლებით შესრულებული უკონტაქტო გადახდების მაქსიმალური თანხის ან უკონტაქტო გადახდების რაოდენობის დათვლის მიმართ იმავე მუხლით დადგენილი მოთხოვნების შესრულება უზრუნველყოს არაუგვიანეს 2021 წლის 1 მარტისა. 2021 წლის 1 მარტამდე მომხმარებლის ძლიერი ავთენტიფიკაციის გარეშე შესრულებული უკონტაქტო გადახდების თანხა არ უნდა აღემატებოდეს 100 ლარს.

13. საგადახდო მომსახურების პროვაიდერი ვალდებულია არაუგვიანეს 2022 წლის 1 იანვრისა დანერგოს გადახდის ოპერაციების მონიტორინგის მექანიზმი, რომლითაც ის შეძლებს არაავტორიზებული ან/და თაღლითური გადახდის ოპერაციების იდენტიფიცირებას.

14. 2023 წლის 1 ივნისიდან ამ წესის მე-12, მე-14–მე-20 მუხლებით (გარდა საბარათე გადახდის ოპერაციების მიმართ) განსაზღვრული გამონაკლისებით სარგებლობისათვის საგადახდო მომსახურების პროვაიდერი ვალდებულია დანერგილი ჰქონდეს ამ წესით გათვალისწინებული შესაბამისი მონიტორინგის მექანიზმი, ხოლო საბარათე გადახდის ოპერაციების მიმართ იმავე მუხლებით განსაზღვრული გამონაკლისებით სარგებლობისთვის – არაუგვიანეს 2024 წლის 1 აპრილისა.

15. ამ წესის მე-5 მუხლის პირველი და მე-3 პუნქტებით განსაზღვრული პირველი აუდიტი უნდა განხორციელდეს არაუგვიანეს 2024 წლის 1 ივლისისა.

16. საგადახდო მომსახურების პროვაიდერი, რომელსაც სურს ამ წესის ამოქმედებამდე გამოშვებული საგადახდო ინსტრუმენტის მიმართ ისარგებლოს ამ წესის მე-4 მუხლის პირველი პუნქტით გათვალისწინებული უფლებამოსილებით, ვალდებულია საქართველოს ეროვნულ ბანკს ამ წესის ამოქმედებიდან 30 კალენდარული დღის ვადაში წერილობით მიაწოდოს ასეთი საგადახდო ინსტრუმენტის შესახებ ინფორმაცია და აღწერა. საქართველოს ეროვნული ბანკი საგადახდო მომსახურების პროვაიდერის მიერ აღნიშნული უფლებამოსილებით სარგებლობის თაობაზე გადაწყვეტილებას იღებს შეტყობინების წერილობით მიღებიდან 60 სამუშაო დღის ვადაში. საქართველოს ეროვნული ბანკი გადაწყვეტილებაში განსაზღვრავს ვადას, რომლის განმავლობაში აღნიშნულ საგადახდო ინსტრუმენტზე არ გავრცელდება ამ წესის მოქმედება.

17. ამ მუხლით გათვალისწინებული დებულებებით სარგებლობის შემთხვევაში, გადამხდელის საგადახდო მომსახურების პროვაიდერი ვალდებულია გადამხდელს აუნაზღაუროს მომხმარებლის ძლიერი ავთენტიფიკაციის გარეშე შესრულებული არაავტორიზებული გადახდის ოპერაციის თანხა დაუყოვნებლივ, მაგრამ არაუგვიანეს იმ დღის მომდევნო სამუშაო დღის ბოლომდე, როდესაც აღნიშნულის შესახებ პროვაიდერისთვის ცნობილი გახდა ან მიიღო შეტყობინება. გადამხდელის საგადახდო მომსახურების პროვაიდერი ვალდებულია აღადგინოს დადებულ საგადახდო ანგარიში იმ მდგომარეობაში, რომელშიც ის იქნებოდა მომხმარებლის ძლიერი ავთენტიფიკაციის გარეშე არაავტორიზებული ოპერაცია რომ არ შესრულებულიყო. პროვაიდერს არ ეკისრება გადამხდელისთვის ანაზღაურების ამ პუნქტით გათვალისწინებული ვალდებულება, თუ მას მომხმარებლის მიერ თაღლითური ქმედების შესახებ საფუძვლიანი ეჭვი აქვს და აღნიშნული საფუძვლის შესახებ წერილობით შეატყობინა საქართველოს ეროვნულ ბანკს და მიმართა შესაბამის სამართალდამცავ ორგანოს.

18. თუ ამ მუხლით სხვა რამ არ არის გათვალისწინებული, საგადახდო მომსახურების პროვაიდერი



საქართველოს ეროვნული ბანკის პრეზიდენტის 2020 წლის 9 დეკემბრის ბრძანება №216/04 - ვებგვერდი, 10.12.2020 წ.
საქართველოს ეროვნული ბანკის პრეზიდენტის 2021 წლის 28 დეკემბრის ბრძანება №183/04 - ვებგვერდი, 28.12.2021 წ.
საქართველოს ეროვნული ბანკის პრეზიდენტის 2022 წლის 29 დეკემბრის ბრძანება №191/04 - ვებგვერდი, 29.12.2022 წ.
საქართველოს ეროვნული ბანკის პრეზიდენტის 2023 წლის 11 აპრილის ბრძანება №70/04 - ვებგვერდი, 12.04.2023 წ.
საქართველოს ეროვნული ბანკის პრეზიდენტის 2023 წლის 22 დეკემბრის ბრძანება №373/04 - ვებგვერდი, 22.12.2023 წ.
საქართველოს ეროვნული ბანკის პრეზიდენტის 2024 წლის 27 ნოემბრის ბრძანება №289/04 - ვებგვერდი, 28.11.2024 წ.
საქართველოს ეროვნული ბანკის პრეზიდენტის 2025 წლის 30 დეკემბრის ბრძანება №313/04 - ვებგვერდი, 30.12.2025 წ.

დანართი

	თაღლითობის მაჩვენებელი (%):	
გამონაკლისით სარგებლობისთვის ოპერაციის თანხის ზღვრული ოდენობა	დისტანციური ელექტრონული საბარათე გადახდები	დისტანციური ელექტრონული საკრედიტო გადარიცხვები
500 ლარი	0,01	0,005
250 ლარი	0,06	0,01
100 ლარი	0,13	0,015

